

Recordatorio de deberes legais dirixido ao Concello de Poio para que adopte con carácter urxente as medidas previstas no artigo 22 da Lei 3/2007, para resolver a situación.

Expediente: F.11.Q/6999/21

Santiago de Compostela, 7 de febreiro de 2023

Sr. alcalde:

Ante esta institución, mediante escrito de queixa, compareceu solicitando a nosa intervención D XXX, propietario dunha vivenda no lugar de Lourido, no Concello de Poio.

ANTECEDENTES

O escrito de queixa foi rexistrado nesta institución na data do 21 de xuño de 2021 en el indicaba a presenza dunha masa forestal de eucaliptos a carón da súa vivenda.

No primeiro informe recibido do concello con data do 19/07/2021 confírmase que o expediente iniciouse a instancia de parte con data de 25/02/2021, e tras comprobacións por parte dos servizos técnicos do estado da parcela denunciada, enviouse unha primeira notificación con data 26/03/21 ao suposto titular da parcela, datos facilitados polo denunciante, xa que os titulares e o reparto catastral non coincide coa realidade, resultando estes descoñecidos.

-A persoa propietaria que fora notificada procedeu á limpeza da súa parcela, resultando unha franxa duns 10 metros e non toda a parcela que aparece no catastro e onde se atopa a masa de árbores obxecto da presente denuncia.

-Os servizos técnicos municipais visitaron a zona o día 12/07/2021 xunto coa persoa denunciada, constatando que a súa parcela estaba limpa, e que existían numerosas parcelas nese lugar, ao poder localizarse os distintos marcos que as delimitan. A persoa que promove este expediente manifesta o seu desacordo con esta información, indicando que en realidade a parcela na que se atopan os eucaliptos pertence a dúas irmás que non queren facer fronte aos gastos da limpeza e retirada das árbores.

-Nese informe de xullo de 2021, indicaba esa Administración local que, examinada a situación, deberíase publicar no BOE e no DOG a situación do expediente, as liquidacións provisionais e o correspondente prazo de audiencia, para que unha vez rematado, se elevara o expediente á Xunta de Goberno Local e dar traslado do mesmo a continuación á empresa

pública SEAGA, para que procedera á execución subsidiaria, segundo o convenio asinado entre os Concellos (FEGAMP), SEAGA e a Xunta de Galicia.

-A primeira actuación municipal non se produciu ata o día 11/04/2022, data na que procedeuse a notificar as parcelas de referencias catastrais XXXXXXX cada unha pertencente a un propietario distinto segundo os datos de Catastro.

-Ademais, publicouse no BOE, con data 13/04/2022, a parcela de referencia catastral XXX. Comprobadas as entregas e notificacións efectuadas, observouse que dita notificación non puido ser practicada no que respecta ás parcelas de referencia catastral XXX e XXX, polo que se procedería a efectuar unha nova publicación no BOE, xa solicitada, na data de 02/06/2022, dando 15 días aos interesados para o coñecemento íntegro do anuncio e que procederan ás alegacións que estimasen oportunas.

O informe da Administración municipal de Poio remataba indicando que elevaríase a XGL unha proposta de execución subsidiaria das parcelas que quedasen sen limpar, para unha vez obtida autorización xudicial de entrada ás parcelas proceder a dita execución.

O 30 de novembro de 2022 rexístrase un novo escrito no que o reclamante nos comunica que os eucaliptos seguen sen ser retirados.

ANÁLISE

Á vista do contido do escrito de queixa, da documentación achegada pola persoa que promoveu este expediente e do que se manifesta nos informes da Administración municipal, é preciso facer as seguintes consideracións:

Ao non constar a identidade do actual titular da parcela forestal, cómpre aplicar o disposto no artigo 22 da Lei 3/2007:

-No suposto de incumprimento das obrigas establecidas na lei, cando non se poida determinar a identidade da persoa responsable da xestión da biomasa vexetal e retirada de especies arbóreas prohibidas ou resulte infrutuosa a notificación da comunicación á que se refire o número anterior, esta efectuarase mediante un anuncio no Boletín Oficial del Estado e no Diario Oficial de Galicia, no que se incluírán os datos catastrais da parcela. Nestes supostos o prazo para o cumprimento computarase desde a publicación do anuncio no Boletín Oficial del Estado.

-Transcorridos os prazos sinalados neste artigo sen que a persoa responsable xestione a biomasa ou retire as especies arbóreas prohibidas, a administración pública competente poderá proceder á execución subsidiaria, atendendo ás necesidades de defensa contra os

incendios forestais, especialmente respecto da seguridade nas zonas de interface urbano-forestal, consonte o establecido no artigo 44 da Lei 43/2003, do 21 de novembro, de montes, ou norma que a substitúa, sen prexuízo da repercusión dos custos da xestión da biomasa á persoa responsable. Os custos que se repercutirán poderán liquidarse provisionalmente de maneira anticipada, mesmo na comunicación á que se refire o número 2, e realizarse a súa exacción desde o momento en que se verifique o incumprimento da obriga de xestión da biomasa nos prazos sinalados neste artigo, sen prexuízo da súa liquidación definitiva logo de rematados os traballos de execución subsidiaria. Para a liquidación dos custos correspondentes a cada parcela a Administración terá en conta a cantidade resultante de aplicar a parte proporcional á cabida da parcela do importe do correspondente contrato, encomenda ou custo dos traballos realizados na zona de actuación.

-Cando a identidade da persoa responsable non sexa coñecida no momento de proceder á execución subsidiaria, a repercusión dos custos adiarase ao momento en que, de ser o caso, chegue a ser coñecida, sempre que non prescribisen os correspondentes dereitos de cobramento a favor da Facenda pública. Se a execución subsidiaria inclúe a retirada de especies arbóreas prohibidas, darase traslado da resolución na que se acorde a dita execución subsidiaria ao órgano competente para a incoación do correspondente procedemento sancionador, o cal deberá proceder de inmediato á adopción do acordo de incoación do expediente sancionador e da medida cautelar de comiso das indicadas especies.

-O destino das especies obxecto de comiso será o seu alleamento, o cal será efectuado, nos termos regulados nesta lei, pola administración que realízase a execución subsidiaria. No caso de venda das especies obxecto de comiso, os importes obtidos deberán aplicarse, por parte da administración que realice tales vendas, a sufragar os gastos derivados das execucións subsidiarias da súa competencia.

Ante a falta de atención do apercebimento, as obrigacións de xestión para os anos seguintes deberán estar completadas antes do primeiro día de abril. Así mesmo, nesta comunicación xa se informa de que a falta de cumprimento das obrigacións indicadas é constitutiva de infracción administrativa, polo que dará lugar ao comezo do procedemento sancionador que corresponda, no que poderán adoptarse medidas de carácter provisional consistentes en traballos preventivos de xestión da biomasa e retirada de especies arbóreas co obxecto de evitar os incendios forestais e comiso das indicadas especies.

Naqueles casos nos que as persoas responsables non atendesen a advertencia que se lles efectuou o ano anterior para o cumprimento das súas obrigacións de xestión da biomasa e retirada de especies, dita xestión deberá estar finalizada con anterioridade ao primeiro día de abril de cada ano. Transcorrida dita data e comprobado polos servizos técnicos da

administración competente a falta de xestión, poderá procederse de modo inmediato, sen máis trámite, á execución subsidiaria da mesma.

A tal fin, ese concello pode solicitar a colaboración do SEAGA para a retirada das especies arbóreas prohibidas, neste caso, os eucaliptos a carón da vivenda.

CONCLUSIÓN

Por todo o anterior, considerase necesario, en aplicación do disposto no artigo 32.1 da Lei 6/1984, do 5 de xuño, do Valedor do Pobo, facer chegar a ese Concello de Poio o seguinte **recordatorio de deberes legais:**

Que o concello adopte con carácter urxente as medidas previstas no artigo 22 da Lei 3/2007, para resolver a situación, tendo en conta que na comunicación aos propietarios esta prevista a advertencia de que, en caso de persistencia no incumprimento transcorrido o prazo establecido, procederá á execución subsidiaria con repercusión dos custos de xestión da biomasa e, no seu caso, comiso das especies arbóreas prohibidas retiradas pola Administración, nas condicións establecidas neste precepto.

Agradézolle de antemán a acollida ao manifestado nesta resolución da Valedora do Pobo, e recórdolle a necesidade de que no prazo dun mes (art. 32.2), dea conta a esta Institución da aceptación da resolución formulada, de ser o caso, e das medidas adoptadas para darlle efectividade, tamén se é o caso. Ademais, facémolle saber que, en aplicación do principio de transparencia, a partir da semana seguinte á data na que se ditou a presente resolución, esta incluírase na páxina web da institución.

O principio de publicidade das resolucións desta institución refórzase no artigo 37 da Lei 6/1984, cando prevé que a Valedora do Pobo, no seu informe anual ao Parlamento de Galicia, dará conta do número e tipos de queixa presentadas; daquelas que foron rexeitadas e as súas causas, así como das que foron obxecto de investigación e o seu resultado, con especificación das suxestións ou recomendacións admitidas pola administración pública galega.

Saúdoo atentamente.

María Dolores Fernández Galiño
Valedora do Pobo